

佢最好食个客家菜

朝晨要出門去學校讀書个時節，阿姆同佢講暗晡夜姐公姐婆愛來屋下食飯喔！想著異久無見面个姐公姐婆，想著佢兜會帶麼个好食个零嗒來，歡喜到無心思專心上課咧，先生看佢憨憨笑，問佢係毋係發白日夢！?盡無簡單等到放學時節，赴毋掣同先生講正來奈，佢背起書包三步當二步走轉屋下，因為佢个肚屎枵到變背曩咧，緊走緊想阿姆會煮麼个好食个菜?該酪酪个豬腳、香噴噴个客家炒肉，還有~~還有~~~阿姆俚！仰結煞！佢个口涎水濇濇跌咧。

一到門口就鼻著焮豬腳个香味，就係這味緒！就係這味緒！阿姆正經有聽到佢个心聲，知佢愛食焮到酪酪个豬腳，有影係姐哀連心啊。跔等這香味行入灶下，看阿姆在該無閒直掣想愛搵手，阿姆講：阿香妹，去撿碗筷，姐公姐婆黏時就到咧。這下，佢看著桌頂有一盤客家炒肉，哇！這係阿姆个手路菜，焮到噴香个三層肉，還有豆腐乾同魷魚，實在枵到仔毋著咧，看阿姆轉身落去灶下，佢偷偷仔拈

一坭豆腐乾，心肝肚想無人看到無要緊，盲知還盲放入嘴肚嘅分愛投入个老妹看著，佢去投阿媽講阿姐偷拈菜啦，遽遽將該坭豆腐乾放入嘴肚。嗯~~還好个味緒，老妹盡毋甘願、面臭臭仔，佢想佢定著乜當想要拈一坭來食看啊！

阿媽將煮好个菜一項一項兜出來，毋單淨有豬腳、客家小炒，還有黃金油亮个雞盤，清甜帶甘味个覆菜排骨湯，焙到香噴噴搵蒜仁醋个鹹豬肉，

咦!佢會無看到豬腸炒薑絲呢?阿媽講等一下姐公姐婆到咧來炒，正毋會靚忒。一桌頂个菜全係客家人好食个味緒，也係佢最好食个客家菜，暗晡夜佢定著愛食加兩碗飯。聽到姐公姐婆个聲，佢煞煞去拉佢兜入飯廳，做得食飯咧！

最尾一項豬腸炒薑絲乜兜出來咧，脆脆个豬腸嫩嫩个薑絲，酸丟丟仔~~阿爸最愛同味拿來攪飯，佢講這味當扯飯哦！佢還係要攪豬腳个味，單淨攪這味就食到毋知好飽咧，阿爸笑佢講，香妹，該妳就食這項就好咧，伸个佢來食，哪做得！恁豐沛恁好

食个味緒毋食，仰會對得起自家个肚屎！

阿姆煮个客家菜一等好食，佢定著愛來同佢學，同佢最好食个客家菜煮出阿姆个味緒。